



Milik Departemen P dan K
Tidak diperdagangkan
Untuk umum

Porlak Parsanggulan

Japarlagaan
Aisyah Ibrahim Batubara



Direktorat
Budayaan
4

Departemen Pendidikan dan Kebudayaan



Milik Dep. P dan K
Tidak diperdagangkan

099.224
JAP
P

PORLAK PARSANGGULAN

Dikarang oleh
JAPARLAGUTAN
Dialihaksarakan oleh
AISYAH IBRAHIM-BATUBARA



Departemen Pendidikan dan Kebudayaan
PROYEK PENERBITAN BUKU SASTRA
INDONESIA DAN DAERAH
Jakarta 1980

Diterbitkan oleh
Proyek Penerbitan Buku Sastra
Indonesia dan Daerah

Hak pengarang dilindungi undang-undang

Kata Pengantar

Bahagialah kita, Bangsa Indonesia, bahwa hampir di setiap daerah di seluruh tanah air hingga kini masih tersimpan karya-karya sastra lama, yang pada hakekatnya adalah cagar budaya nasional kita. Kesemuanya itu merupakan tuangan pengalaman jiwa bangsa yang dapat dijadikan sumber penelitian bagi pembinaan dan pengembangan kebudayaan dan ilmu, di segala bidang.

Karya sastra lama akan dapat memberikan khazanah ilmu pengetahuan yang beraneka macam ragamnya. Dan penggalian karya sastra lama, yang tersebar di daerah-daerah ini, akan menghasilkan ciri-ciri khas kebudayaan daerah, yang meliputi pula pandangan hidup serta landasan falsafah yang mulia dan tinggi nilainya. Modal semacam ini, yang tersimpan dalam karya-karya sastra daerah, akhirnya akan dapat juga menunjang kekayaan sastra Indonesia pada umumnya.

Pemeliharaan, pembinaan dan penggalian sastra daerah jelas akan besar sekali bantuannya dalam usaha kita untuk membina kebudayaan nasional pada umumnya, dan pengarahan pendidikan pada khususnya.

Saling pengertian antar daerah, yang sangat besar artinya bagi pemeliharaan kerukunan hidup antar suku dan agama, akan dapat tercipta pula, bila sastra-sastra daerah, yang termuat dalam karya-karya sastra lama itu, diterjemahkan atau diungkapkan dalam bahasa Indonesia. Dalam taraf pembangunan bangsa dewasa ini manusia-manusia Indonesia sungguh memerlukan sekali warisan rohaniah yang terkandung dalam sastra-sastra daerah tersebut. Kita yakin bahwa segala sesuatunya yang dapat tergali dari dalamnya tidak hanya berguna bagi daerah yang bersangkutan saja, melainkan juga akan dapat menjelma menjadi sumbangan yang khas sifatnya bagi pengembangan sastra dunia.

Sejalan dan seiring dengan pertimbangan tersebut di atas, kami sajikan pada kesempatan ini suatu karya sastra daerah

Sumatra Utara, dengan harapan semoga dapat menjadi pengisi dan pelengkap dalam usaha menciptakan minat baca dan apresiasi masyarakat kita terhadap karya sastra, yang masih dirasa sangat terbatas.

Jakarta, 1980

Proyek Penerbitan Buku Sastra
Indonesia dan Daerah

DAFTAR ISI

Ringkasan	9
1. Hudon	13
2. Pitudar	13
3. Sordam	13
4. Mangkail	13
5. Tuhu-tuhu	14
6. Lipan	14
7. Unte	14
8. Burangir	14
9. Laut	15
10. Sarir	15
11. Bargot	15
12. Baliung	15
13. Lombu	16
14. Amporik	16
15. Halu	16
16. Kol	17
17. Ende	17
18. Onan	17
19. Incor	18
20. Lasiak	18
21. Manuk	18
22. Rambutan	18
23. Sumangge	19
24. Hatutu	19
25. Tungkot	19
26. Hajaran	19
27. Gondang	20
28. Manise	20
29. Anggi	20
30. Layang-layang	21
31. Batu Suratton	21

32. Dan	21
33. Marburu	21
34. Poting	22
35. Parira	22
36. Mambayu	22
37. Halibutongan	22
38. Sigurindik	23
39. Hiyong	23
40. Padati	23
41. Bodat	23
42. Lalo	24
43. Bunga	24
44. Mata ni ari	24
45. Loting	24
46. Hayuara	25
47. Marun	25
48. Margala	25
49. Tarutung	26
50. Bubu	26
51. Udan Potir	26
52. Bulan Tula	26
53. Hagoran	27
54. Huting	27
55. Turi	28
56. Baro Pege	28
57. Buaya	28
58. Pano	29
59. Biola	29
60. Ulok	29
61. Gompul	30
62. Halihi	30
63. Losung Aek	30
64. Loba	31
65. Pilo-pilo	31
66. Modomkon	31
67. Busisa	32

68. Si Mopul	32
69. Rondang Bulan	32
70. Manongos surat	33
71. Bada Mambaen Rugi	34
72. Dandanak na Oto	34
73. Hobar Rarat	35
74. Na Somak	35
75. Sala Hosing	36
76. Manyirai Bona ni Pahu	36
77. Mamolgang huting	37
78. Parpahan na Madabu	38
79. Pamorsan na Barat	38
80. Na Oto Dohot Halinuna	39
81. Pardahan na Oto	39
82. Mambiar-biari	40
83. Huling-kulingan	40
84. Marun	41
85. Markuayam	41
86. Mapantutu	42
87. Na Padot	43
88. Martondung	43
89. Halak na Oto Marparau	44
90. Udutna	44
91. Mangorar	45
92. Ende	45
93. Mangkopok	47
94. Na Ingol Sabagas	47
95. Sapitis Nibagi Lima	48
96. Jaksa na Bisuk	49
97. Gabus Alo ni Gabus	49
98. Manangko Podoman	50
99. Surat Bulung-bulung	51
100. Nyae na Mangalangkoti	52
101. Manggoar-goari Binatang	52
102. Manangkal	53
103. Mambuat Ipon	53

104. Hurimbang	54
105. Sinaiasan	55
106. Halak Harangan	55
107. Laing Muap Do na Busuk	56
108. Surat ni Manjuram	57
109. Hata Gonjak	57
110. Marpulut	58

Ringkasan PORLAK PARSANGGULAN

Buku ini merupakan kumpulan cerita pendek. Bahasanya tidak begitu sukar dan mudah dipahami. Isinya dikaitkan dengan keadaan lingkungan hidup sehari-hari pada waktu itu. Pada umumnya isi buku ini dapat dibagi sebagai berikut.

1. Karangan-karangan yang menyangkut peri kehidupan sehari-hari yaitu mulai dari no. 1 sampai dengan no. 70. Diceritakan di sini tentang Mengail, Laut, Lombu dan sebagainya. Pada no. 17, terdapat sebuah puisi sebagai selingan. Isi puisi ini adalah luapan perasaan rindu pada seorang kekasih sehingga siang terbayang-bayang, malam termimpi-mimpi. Di samping puisi itu terdapat lagi sebuah puisi (ende) yang dapat kita golongan kepada pantun nasib, yaitu no. 92.
2. Cerita yang mengandung unsur didaktik terdapat pada no. 68, 91, dan 107. Misalnya no. 68 tentang cerita si Mopul yang menggambarkan seorang anak yang rajin serta patuh pada kedua orang tuanya. Pada no. 91 diceritakan tentang seorang anak yang disuruh orang tuanya pergi bersekolah di tempat lain, tapi menghambur-hamburkan uang saja. Pada suatu hari ia mengancam orang tuanya akan bunuh diri dengan meminta pistol. Tapi ancaman itu tak dapat terlaksana, karena orang tuanya tahu apa maksudnya yaitu mengancam (mangogar) saja.
3. Bagian yang paling menarik di sini ialah no. 71 sampai 110, karena bagian ini menonjolkan aspek humor di dalamnya. Misalnya tentang kebodohan orang-orang desa yang ingin naik sado dengan membawa barang-barangnya (no. 106; Halak Harangan) yang berusaha meringankan beban sado itu dengan berjongkok saja. Jadi ia tidak usah duduk supaya beban sado jadi ringan. Cerita-cerita dalam kelompok ini

dapat dipakai sebagai bahan perbandingan dengan menampilkan aspek humornya dalam sastra Indonesia lama.

Kedunguan dapat juga dipandang sebagai salah satu aspek humor seperti yang terdapat dalam cerita no. 77 yang berjudul "Mamolgang Huting" yang berarti Merebus Kucing. Ceritanya sebagai berikut: Seorang wanita bernama Boru Munte membawa kucingnya ke sawah supaya tikus-tikus di sawahnya lenyap semuanya. Pada suatu malam hujan turun amat derasnya. Di sawah itu tidak ada tempat berteduh untuk kucingnya, sehingga kucingnya menggigil karena kedinginan. Boru Munte sangat kasihan melihat kucingnya itu. Segera ia memasakkan air dengan maksud untuk menghangatkan badan kucing itu. Kemudian ia memasukkan kucing itu ke dalam rebusan air. Tidak lama kemudian kucing itu menyeringai dan gigi-giginya kelihatan. Boru Munte mengira bahwa kucing itu ketawa karena betul-betul merasa senang sebab badannya sudah tidak kedinginan lagi. Boru Munte pun sangat gembira. Ia tidak mengira bahwa kucingnya sudah mati.

Selanjutnya dapat kita baca unsur kedunguan pada cerita-cerita berikutnya antara lain: Naoto dohot halinuna, artinya Si Bodoh dengan bayangannya. Si Bodoh disuruh kakaknya membawa pulang ikan-ikan yang mereka peroleh dari hasil mengail. Kakaknya berpesan pada adiknya bahwa ia tidak boleh kikir. Kalau ada yang melihat ia membawa ikan, hendaklah diberi juga barang seekor.

Sewaktu Si Bodoh ini pulang tak ada orang yang melihatnya. Tetapi ketika ia berbalik ke belakang ia melihat bayangannya sendiri. Ia mengira bahwa itu bayangan orang lain. Dilemparkannyalah seekor ikan kepada bayangan itu. Tak lama kemudian ia menoleh lagi ke belakang. Bayangan itu tetap mengikutinya. Ia pun melemparkan seekor ikan lagi. Begitulah seterusnya sampai habis semua ikannya. Tapi bayangan tetap mengikutinya. Tidak ada yang dapat diberikannya lagi selain dari pakaiannya. Akhirnya ia terpaksa

menanggalkan pakaiannya sendiri untuk diberikan pada bayangan itu sehingga ia telanjang bulat sampai di rumah.

1. Hudon

Hutingnami na lomlom i manaek tu parapi. Anggo mingku na giot manangko gulaen do ia. Hapengani adong disi monci di lambung ni hudon tano, Manigor dijombai huting ma monci i. Bo tartondong ia hudon i. Dumpang ia do nian monci i, tai madung rugi hami, angke matapor hudonnami i.

Sugari sura inda adong hudonnami na asing aha be parda-hanannami.

2. Pitudar

Na go ma antong pitudar manyangkuliti boti na rantos iponna.

Muda hum giot manorasi dope harambirmami bulus ro ma pitudar manggiriksa, na bahat ma harugiannami dibahen pitudar. Ise do hamu umboto panangkal ni pitudar? Muda tartangkal pitudar martaon ma i harambirmami i asa umbahat ma i bangkitanna.

3. Sordam

Andostorang i nangkin hubege halak marsordam. Sorana taru mariyot-iyot songon na mangandung.

Dung torang ari husapai sanga ise do na marsordam i; didok si Badu Yakumaren halak Marancar. An bulus harkar do hulala pardangolan muda hubege halak marsordam.

Bulu aha ma dibaen halak sordam? Songon dia binaen pang-girikna.

4. Mangkail

Natuari mangkail si Gurenceng di Lubuk Jabaden empanna lalat dohot gadung riyo. Bulus manyoro mera balun na bolon sangkibung. Inda taralo si Gurenceng mera i hara ni gogona. Hailnia i magotap, pamaoranna pe mago muse. Lopus samon ari laing

holom do ma si Gurenceng hara ni tolpukna rohania.

5. Tuhu-tuhu

Eme ni Jepangget dampak harimburanna ma. Di tonga-tonga ni sabania i dipajongjong ia tuhu-tuhu pitu anak tanggana.

Di tuhu-tuhu i ma dakdanak ni Jepangget marjuguhan mamuro amporik.

Muda tar humolang do amporik maruyup-uyup ma daganak i laho marende ende papotang-potang ari.

6. Lipan

Madabei lipan sian pamispisan ni bagas. Ro ina ni manuk sada bulus dipagutsa lipan i. Sala pagut lakna manuk i, nada uluna dipagut ia tai partongaanna do. Ro lipan ia didoit ia baringbing ni manuk i.

Inda sadia lolot manyarira ma manuk i angke madung susur bisa ni lipan i.

Hara ni hancitna mangumporpor ma manuk i giot mate. Lipan i malua ma.

7. Unte

Marrogam do pangalaho ni unte. Adong unte sipanganon songon unte manis dohot unte hasumbo. Adong unte pangir i ma unte mungkur. Adong muse unte asom i ma unte hapas dohot unte sunde. Tai adong muse dope unte na hum tu pulungan ni daon hasayana songon unte albung, unte horsik dohot unte susu. Unte aha unte jao?

8. Burangir

Di onan digadis halak burangir. Ka bahat halak hita Batak halaklahi sanga dadaboru na parburangir.

Muda maniktik burangir angkon adong do gambirsoda, pining dohot timbakona.

Diboto hamu do sanga piga harambar burangir na salop i?

9. Laut

Na lobi bolak ma antong lakna laut. Laut i nada maruaso, laing tong do marombak-ombak.

Di laut adong hopal na bolon-bolon panarui ni halak dohot barang.

Dung i na jogi muse di diparparan na menek-menek na nida-yungkou. Adong muse antong na nirayarkon.

Anggo na so somal marparau dodas do mabuk di laut.

10. Sarir

Natuari sada ro udan mandahoyu adong do sagoin lolotna. Aek godang pe mombur na lobi lotok.

Sarir ni lobe i taru jumpak lobi do tonga lima ratus hurare, pitu pulu mera, dua ratus lelan na hona sarir i.

Anggo udang gala ulang be i nihobaran, taru na mangkurasi doma.

Lobe i na pala situtu, anggo hum sajungingan do binuat gulalunia tama do i rohania, nada i muruk ia.

11. Barget

Tarup ni bagas ni suhu i ijuk, tai anggo tarup ni bagas ni jaksa i ri.

Barget ni suhu i na jajian. Adong do tolu opat ratus gabona. Muda markasaya ijuk disia ditolas ia ma ijuk ni bargetnia i.

Ganop sogot ganop potang lanig na manggual ma suhu i. Dibaen i ma lanig na manggadis ngiro dohot gulo do ia.

Pardok jolo sanga aha ma na binotomu hasaya ni ijuk dohot hasaya ni batang ni barget.

Tu aha muse do hasaya ni tarugina dohot lidina i dibaen halak?

12. Baliung

Jakolet manaba hayu mangkin, adong do sandinahop godang-na.

Nada dope marumbak hayu i bulus malopang ma baliungnia. Madung langka ia sannari tu panopaaan ni Jasinaloan an patitipkon baliungnia i, angke Jasinaloan ma na tarbonggal na lo manopa, boti pe na denggan muse ning halak panyopunia.

Ise do hamu na dung unjung manondur halak na manopa? Aha-aha ma diida kamu baenon ni harolak sipanopa i ?

13. Lombu

Saborngin on lanig na dijagoi ni halak ma bara ni lombu na di huta ni Yamarajai. Angke antong ganop borngin lanig babiat tu bara i.

Lombu manggala ni Sutan i madung disoro babiat. Ilmu i do na umbolon ama ni lombu di huta i.

Au pe sura por muse do rohangku giot marlombu, angke muda adong untungna bahat labona. Tai muda masa burnung marsak ma rohani ba ampot ma i tuatean lombuniba i.

Paboa ma jolo sanga sangon dia pambaenna mambuat dadi ni lombu i.

14. Amporik

Lobe Unto na garangan mambuat amporik di asarna asa dilehan ia ma i di anaknia.

Huhul perek do iluniba mangida parsahitan ni amporik i di baen dakdanaknia i.

Dibutbuti halahi do i ngolu-ngolu, dungi dijungkiti halahi mata na i. Ulang tiru kamu dakdanak parange ni pomparan ni Lobe Unto i.

Lobe Unto i, nangke haru mangarugihon pe amporik i nada tama songon i baenon tu sia. Pala mamunu amporik sanga manuk dohot sanga aha pe ulang niparsahitan jolo.

15. Halu

Jop situtu rohangku muda hupamatai halu i marlangei di tobatnami i. Muda huambungkan bulung suhat tu tobat i marsijolo-joloan ma halahi mambuatsa.

Di na bolak na di Gunungtua ma halu ma bolon-bolonna.
Anggo parbungkak diloksa do sasaanduri bolak ni halu na disi i.

Anggo hulala halu ma ihan tobat na tabona. Anggo haruting
hurang do tabona.

16. Kol

Sagaman simarata kol ma na mubana. Nada hum unggas hape
na marpira, kol pe marpira do.

Muda dipmanat hamu kol Gunungbaringin, kol Pakantan, kol
Sipirok, kol Tarutung diboto hamu ma sanga bia pira ni kol.

Indangkon pe sai nigule hum nibolgang sajo pe tabo ma i
panganan.

Mariari muse muda lelan donganna nada be binoto mandok
tabona.

17. Ende

Habang ma dao-dao
Dirambas hodong do hatina
Pamatang padao-dao
Nihombar modom do tondina
Tanda ni au galunggung
Jolo sitanggis podom-podom
Tanda ni au parlungun
Jolo tangis anso modom
Satarak do i satapongan
Jauk-jauk salempang Padang
Marsarak baya dohot dongan
Nitatangan pidong habang

18. Onan

Marragam jagalan ni halak di onan. Sanga aha giotniba adong
ma disi.

Sian topi duru ni onan i ma na somal parjagalan abit. Di
tonga marbanjar-banjar parjagal simarata, gulaen, timbaho dohot

angka na asing.

Marsidok di bana ma hamu jolo sanga ari aha do onan di banua-munyu be.

19. Incor

Dainang na ringgasan mandurung, Muda lumangga ma bae-norinia kehe ma ia mandurung incor tu saba.

Di bondar ni sabanami i na bahatan incor tali.
Huhul dumpang ia do jabat saparin dahanan. Incor i diboyom ia di bulung ni hunik. Jadi ma antong tabona. Disi tabo disi huskus-na, angke singkop do panguskusina dibaen ia.

20. Lasiak

Aropku giot do hamu mangan lasiak. Tama do nian mangan lasiak, tai ulang pola songon papangan ni ambaroba.

Ning halak sanga ise ma gomos mangan lasiak jotjot hona baromunyi.

Diboto homu do sanga halak dia na gumarang mangan lasiak?

21. Manuk

Ina ni manuk ni si Ramisa dipangan misang.

Tading pitu anakua maranciohan. Sum ma ibo ni roha ni si Ramisa paida-ida anak ni manuknia i.

Ganop sogot ganop potang laing na nilehen ia ma monis panganonna.

Dung langka-langka indalu pe anak ni manuknia i anso sumada roha ni si Ramisa.

22. Rambutan

Sude do hita mananda rambutan Manombo jailan do dido halak goar ni rambutan.

Rambutan Ace nada dope sadia adong di Angkola, di Mandailing, di Padangbolak dohot di Toba.

Muda por rohamunyu giot manyuan rambutan Ace martona

hamu tu Barus. Anggo disu nidok i pe rabionna tola do.

23. Sumangge

Sanga ise na dung somal tu luat Mandailing dobotosa ma i sumangge.

Sumangge i duhut-duhut di saba do, tar songon-songon sarumpepe di Angkola. Sumangge dohot podom-podom rap simarata na tubu di saba ma i. Sumangge i nibolgang, dung i nidaisan tu lasiak na tabo i ning halak luat Panyabungan.

24. Hatutu

Jop situtu roha umbege parkatutu ni hatutu. Muda hatutu na dung mau hum nidotek pe dohot tanganniba tu lambung ni haranjangana i bulus manguku ma i.

Hara ni bangsa unggas simaian do hatutu i, jadi i ma dalanna anso tarpike halak do i. Muda hatutu marpika na mau asa na denggan ra do jabat sampulu sanga tonga dua pulu rupiah argana.

Somalna pala mangaligi tua tilako ni hatutu halak di sisik ni patna, di sisilonna, di tuktukna dohot di parimbuluna do.

Adong dehe hasaya ni i unig rohamu?

25. Tungkot

Andospotang i natuari kehe au marlaho-laho tu toko ni halak Jopun. Huida disu tungkot hayu na lobi jeges panganana. Salotku mangolu nada dope jungada huida tungkot sisongon i. Husapai tuhorna nada hurang tonga onom rupia ninna nampunasa i Intap sugari dilehen halahi lima rupia na dung hubuat ma i.

26. Hajaran

Sagaman pahan-pahanan hajaran ma na jineges boti na tama lumbuṭon.

Hajaran Batak na dung tarmauk tarbonggal ma i lopus tu tano bariba.

Muda sun jiges ni hajaran i didok halak ma i sitapitua.

Adong muse hubege didok halak hajaran sitahuluk, tongon dia rupana?

Anggo hajaran di hita on na menek-menek do nada adong na jabat tonga dua meter timbona. Di Eropa adong do i na lobi sangkolak hincatna.

27. Gondang

Sian di ompu ni ompunta laing na pusako ma gondang di hita halak Batak.

Muda adong horja boru, patuaek danak sorang, marbongkot bagas sanga mangupa-upa margondang ma.

Marragam do sora ni gondang. Adong gondang porang, adong gondang tortor, adong gondang pasaran, adong gondang boru namora asa adong gondang sikadidit.

Ma huida Sutan Namora Sopang dohot Jarayo margondang. Hornang rohanku mangidasa. Malo do halaki mamalu gondang dotdat manortorkonsa. Na homangna rohaniba dua-dua gondang i sada halak do mamalusa. Tai laing songon na dua halak binege mamalusa.

28. Manise

Dung sun dipodahon guru i di hami tolu sampagul disi dope anso mur tumama hami lala panisenami. Muda hami sise manigor hami boto ma sanga aha na nidokna.

Didok guru i ulang magogotu sora manise. Hum tarbege pe di dongan jadi ma. Dung i ulang marlogu manise. Salaku sanga songon dia halak markobar-kobar laing songon i ma da manise.

29. Anggi

Anggingku hahipasanna mardalan dope saonnari. Tai ba na lobi gatal ia. Muda dapot ia sangkir sanga pinggan bulus na nita-porkonnia do i. Aropku giot tuk ne ma dua lusin sangkir dohot pinggannami na dung nitaporkonnia.

Saonnari panganannia sapa na menek do ma asa panginu-

mannia takar na nihiskisan.

Anggo i ba dut ma roha ni anggingku na gatal i. Nada be tar-taporkon ia i.

30. Layang-layang

Tar sabulan dope dung simpul halak manyabi, ma sae saba sudena. Marsiobani layang-layang ma dakdanak tu tonga saba i. Disi ma halahi palua layang-layang i. Deba mardongung-dongung, deba antong nada. Tama situtu do dakdanak marria ni roha marmayam-mayam anso dumpang hatorkisan. Muda torkis pematang ruminggas ma marsipada asa muda ringgas marsipada dumpang ma i hapistaran dohot simaloan.

31. Batu Suratón

Na holong roha ni si Musa di batu suratónma na ni lehen ni guru i di sia. Didok ia nada sama dilala ia matapor batu suratónma. Angke i ma ning ia sada parkohas na parohon sinaloan dohot hapistaran disia.

Anggo si Komat taru na so niantuskonma do batu suratónma. Hara ni i ma antong anso jotjot matapor batu suratónma.

32. Dan

Adong dan sipanganon, adong muse na so sipanganon sanga halalango. Dan sipanganon i ma dan sibat, dan tandohan dan durame. Dung i adong dope debanari dan na balok. Jotjot ma halak malango mangan dan Bahat do ma huida mate halak na malango dibaen dan di Simaninggir. Tolu halak halahi mangansa, rap mate halahi tolu-tolu. Manat-manat hamu ale mangan dan sanga polut na sasardam i.

33. Marburu

Di ari Sabtu na baru solpu i langka Jaborotan marburu tu payabolak Jajoen.

Hum managup dope anjing parburu na margoar si Gonjong

bulus dida halahi ma urisa tini padua anakna. Dibodil Jajoen hana rungkungna i bulus tinggang. Tai anggo anakna i lalu mago so niida do.

Potang ari bulus marpiyo mangan ma Jajoen dohot Jabarotan hara ni jop ni roha ni halahi.

34. Poting

Potang natuari mangkuling ma niho-niho mandok ulang jolo mamolus-molus tu jalangan na di Tor. Halihi dibaen dompak marpoting disi. Na nipotungan i babiat na manyoro horbo ni Yasikondar i.

Didok halak adong do lima poting nitaon humaliang soroan i. Muda mate da ba babiat i murak ma sada musu ni pahan-pahanan.

35. Parira

Dung do au adong saulak on dope huida parira na murana. Sanang do ma saratus papan.

Tai muda mabahattu pinangan parira mahancit do butuha. Parira dohot potar songon na satompa do tai tumabo dai ni parira. Ise do hamu na dung unjung mangan habo? Dia do taboan habo ulang parira?

36. Mambayu

Yalantoson opat dakdanakna, dua dadaboru dua halaklahi. Pomparannia halaklahi madung rop tu sikola disum ia, tai anggo boruna na dua simanjajing i nada disuru ia marsipoda tu sikola. I mada otoni Yalantoson. Hum mambayu ma baenon nia borunia i. Tai antong anggo mambayu nada dohonon rap na malo ma borunia i.

37. Halibutongan

Muda ro singgar-singgar dodas do tarida halibutongan. Tompa ni halibutongan i na jeges. Adong do disi rara, gorsing, tar rata, na biru pe adong do disi.

Ninna halakna oto nada tola nitudu halibutongan. Muda nitudu malala tangan. Tai tola do nitudu halibutongan dung ni incop situmuduniba. Ulang kamu parsaya di haparsayaan ni halak na oto songon i.

38. Sigurindik

Na sogot muruk guru i di si Joga. Angke maroban sigurindik ia tu sikola. Dibuat guru i sigurindikna i sian bagasan ni sarang ni api-api. Di saku baguma bo dipalua guru i tu duhut-duhut na di pudi ni parsikaloan i. Nada tola niparkancitan sigurindik. Nada tola hamu manyabung sigurindik ning guru i mandok kami sudena.

39. Hiyong

Hiyong ni Oji Sotar madung malo mangkobar. Nada ilip songon halak. Muda mamolus iba di lambungna mangkuling ma ia mandok santabi ale dongan. Huhul gonggong ia martata jabat tarbatuk-batuk, huhul kotek-kotek songon manuk na giot marpira.

Maragam do sinaloan ni hiyongna i hara ni i madung pola dipangido halak dua pulu lima rupa, tai nada dilehen ia angke madung sun holong ni rohana midasa.

40. Padati

Hum bolkos padatinami i tu mandurana mogas ma bomna. Angke rupana na dung madok-doktu do boban ni padati i. Didok damang antahonnami doma marpadati. Angke laing marpupu hami hona rugi salot dung marpodati i. Madung diariarohon damang padatinami dohot horbonami na margoar si Gundur i. Muda ra halak manobusisa tonga dua ratus hami lehen ma.

41. Bodat

Di topi laut muda giot pajjur harambir halak disi halak do manaek. Na somal sai halak Nias ma niupaan. Tai anggo di Angkola sanga di Mandailing bodat do dipodai halak pajjur harambir.

Muda bodat na denggan hira-hira sabulan pe nipodaan malo ma i pajjur harambir. Dibotosa ma dia na tobang dia na poso.

Tai homang rohangku mangida pamodai ni jalak. Biasi laing tong hata Malayu nipodahon tu bodat i. Rupana anggo hata Batak nada i diantusi bodat atehe?

Duga hamu ma jolo podai hamu bodatmuyu hata Batak baen hamu.

42. Lalo

Anggo gogo ni lalo natuari jadi ma jabat rebeng bagas i. Pinggan sangkirmami bahat mangkatapor. Lampu marunggalan, antolu noli martunggaling misang. Jabat mabarbar totku dohot bohingku. Dung mantuk lalo i jabat do marpiyo tondi dainang, dipambaen ia dahanon sasaotik tu ulunami. Mari tondimu ning ia mandok hami sada-sada.

Ibo man rohana ulang be ra mangulakkon lalo i.

43. Bunga

Di alamannami madung disuan damang bunga na hushus na jeges-jeges tompana. Bunga kembang ma disuan ia di tonga-tonga asa bunga malati sian topi duru.

Muda dung marbunga tupudion monggus ma i tu bagasmami i boti pe jeges ma i idaon ni mata di alamannami i.

44. Mata ni ari

Mata ni ari do mangalehen torang dohot milas di tano on. Muda dung ngot hita manyogot asa manatap hita tu purba tarida ma di hita mata ni ari i muldop sian balik ni top i mur lolot mur manaek ma taida lopus tu ambubu.

Muda potang ari nipamataan ma songon na monjop mata ni ari i di balik ni tor na di pastina i.

Sian dia ma bincarna asa tu dia lusutna mata ni ari di hita on?

45. Loting

Bahatan doma saonnari halak markasayahon api-api ulang

loting. Anggo jolo hum loting do diboto halak pambuatan api.

Tai anggo hami na sahuta tagonan do hami marloting ulang marapi-api. Nada sadia hepengniba pasingkop loting. Muda nipa-baenkon loting sadia tu sipanopa lima sen pe ni lehen dijagit ia ma. Anggo luluk dohot batu loting nada pola manobusi gok do dison batu loting poin ni disi bona ni bargot pambuatan ni luluk.

Bia dehe pamasak luluk?

46. Hayuara

Muda dompak marbatu hayuara marroan ma tusi unggas pune amburkon suap, tai sinom-sinom ma na bahatna.

Halak sipamodil pe ro ma tusi maroban bodilna mamodil pidong i.

Hayuara ma sada saguman hayu na jumege di ginjang tano on. Hara ni i ma na jotjot digambar halak hayuara. Dung i didok halak na oto muđa hayuara na balon sai marbegu do i.

47. Marun

Saonan ma dung marun si Juma. Hara ni i ma anso nada ro ia tu sikola.

Mungkana ia na marun i diombar ia marmayam-mayam di ari udan. Madung buyuk sude abit dohot bayinia loang diparabit ia do i Jabat hiang-hiang boti ni pematangnia.

Maruntung dope ia manigor tibu didaoni doktor arunnia i sugari nada didaoni doktor nada binoto betak na marlolot dope arunnia i.

48. Margala

Bahat do haribur-hariburan ni dakdanak di hita on. Margala i ma sada hariburan ni dakdanak na patorkis pematang.

Muda margala marhasaya ma disi sinahipasan dohot hanayangan ni pematang, hara ni ma marsiolat-olat do baenon di sinan. Sugari sura muda dung mentak margala tama ma dakdanak kehe maridi manyabun paras hodok ni pematangna anso sinok modom

borngin.

Madung jungada diida hamu na martumba dakdanak?

49. Tarutung

Halak Ulando nada piga na giot mangan tarutung.

Nabaruon di hatiha masa tarutung i tolu do sonang tuhorna. Tai apala na maol tuhorna na manyimpur ma.

Marragam muse goar ni tarutung. Adong si Tumbaga, adong si Sere, adong si Gaya, adong si Yabak.

Didok halak babiat pe na gomos muse mangan tarutung. Tutu dehe i?

50. Bubu

Andostorang i langka laengku manyido bubu tu aek Pohon, di Jae ni salambuang Hum dibangkit ia bubu i tarkilala disia dok-dok situtu. Anggo saulak on ba aropku jumpak ma au ninna rohana.

Dung hadarot diungkop ia ma hamkam ni bubu i. Bo dirung-rung ia aha dope haruar ma dungdung na bolon manggala-gala. Jadi dipotuk ia ulunia i lalu mate. Godang ni rohania na dumpangan dungdung i nada be boti-boti.

51. Udan potir

Laho langka si Nanggar tu sikola ari i denggan situtu, langit pe sai do tai anggo ronggur laing mangkuling sasaulak. Di tongan dalan ro ma udan, na lobi por udan potir mandahoyu. Inda hum pematang dohot parabiton ni si Nanggar malupuk. Tai buku etongan, buku suraton dohot buku siseonnia buyuk muse sudena.

Songon i pe laing dilaluhon ia do tu sikola. Mabiari ia ampot didok guru i ia na losok. Dung bolkas ia tu sikola disuru guru i ia muli marsalni anso ulang ia marnyae.

52. Bulan tula

Hum lusut mata ni ari di Pastina bincar muse ma bulan sian

purba.

Haroro ni bulan i marnyanganyanga torang sude niida santak tu langit bintang taru mandopan nonop di langit i.

Hatika i lakna si Kapedo dampak marlaho-laho tu Ujung Padang. Rarat ma rohania paida-ida bulan tula dohot bintang na maridopan i, bo marende ma ia juguk martungkol isang.

Poltak bulan tula
Anggi ni suma ni holom
Dangol ni na so markula
Disi potang disi ma modom
(ois da)

Simuntung ni janji lobi
Sirokan na manopi-nopi
Muda untung na tarlobi
Halak tu pokan iba tu kopi
(i le)

53. Hagoran

Di Jae julu taru dobur-dobur sora ni tabu boti dope deal dopang-dopang.

Tarsonggot au huambur sian padomanku mijur tu alaman.

Hubege gaor halak mandok api api !

Hutailihon adop langit madung antong rara di si sinondang ni api tai nada piga dan mantak ma tabu dohot deal i mangkuling.

Hapengani nada man bagas na gor adong santumpuk ri nidu di jae an mosok rupana disurbu bayo mamolus.

54. Huting

Na holongan roha ni si Samida di hutingnia kuring-kuring i. Muda hatika mambayu ma si Samida ngeong-ngeong ma i tu lambungnia tarsongon na adong pangidoonna.

Muda mangan si Samida laing na jolo nilehenma indahanna dohot gulaenna anso mangaum ia.

Giring-giring na gantung di tolonanna i rung reng ma i muda

marlojong-lojong sanga martinjal-tinjal ia.

Hum nada giot mangan hutingna i anggo si Samida marsak ma i rohana. Ois baya na marun do laing hutingkon ning ia ma.

55. Turi

Martahuak manuk padua nolihon ma saborngin on anso modom sabogas Jamanuncang.

Dipaturi halahi tunggal so lobas manurihon turi-turian ni Porda so Diapari.

Ama-ama, ana-ina angka dakdanak adong do dua pulu halak di bagas i.

Inda hum pinggol ni halahi na butong, tai butongan muse dope halahi pangan-panganon. Angke lakna jabat do pamilas kopi halahi magan sipulut, suhat dohot pisang sitabar na nibolgang.

56. Baro pege

Huambang do hum gait ni si Rambe muda mardalan ia. Sai manungkol ak dohot tangan siambirangna hapengani dibaen na adong do baro pege di kihikna siambirang ambaen na songon i pardalanma.

Ditopot ia do ma datu pahabang baronia i tai nada mangasi hadatuoan ni datu i.

Sugari sura kehe ia manopot doktor santongkin do i malum, angke "res" ninna do i digolat doktor i dohot raut na lobi rantos. Boti pe inda pola sadia hancit nilala.

57. Buaya

Jotjot ma aropku tarida di hamu bangga sanga jobar atehe dakdanak?

Togak umbolon laing tar songon tompa ni bangga i ma tompa ni buaya. Muda disoro buaya ma halak anggo somalna di-hail halak ma i buaya na manyoro i binaen marompan manuk na bontar.

Saulak hona hail ma buaya di patupangan na di Barus.

Dung mate buaya i dibunuh halak, marroan ma dadaboru manyurduhon burangir di buaya i. Pangalaho ni na songon i sapai hamu ma guru i anso dipajoer ia di hamu.

58. Pano

Tar dua taon dope dung solpu hum sabolak ni gobang dope pano ni si Rodang. Saonnari bolas ma dohonon giot ditolan pano i ia.

Di tula na boru on kehe ma si Rodang manopot datu tu si-banggor manyapai sanga aha do daon ni pano na i. Ro ninna datu i, anggo panomi Rodang na malum do i, tai angkon jolo dumpang do pulunganna dua ragam. Sada na nigampit ni halihi. Pa-duanna tanduk di hajaran.

"Inda dumpang au i ale datunami" nugi si Rodang laho mijur sian bagas ni datu i.

59. Biola

Muda marbiola si Gandulo na matondo ma au patangi-tangisa.

Didok ia adong ma tolu taon ia dung marsipoda marbiola saulak diasak ia au. "Tangihon ma denggan-denggan anso hubaen logu patibu mardahan," ning ia.

Aha dope do marenet-enet ma dibaen ia. Tarantuk hulala sude pardangolan, madabu sada madabu dua ilungku tu ampuan-ku.

Anggo au na hupuji ma si Gandulo marbiola.

60. Ulok

Na jaji do ulok na bisa tai bahat muse na so marbisa.

Didok halak ulok na bisa: daritano, darisangka, todung api.

Tar sabulan dope saonnari dipagut ulok todungapi anak ni horbo di sampean. Nada jabat tolu jom mate ma anak ni horbo i.

Songon i ma bisa ni todung api. Harani i ale dakdanak jaga-jaga hamu sanga dipagut ulok hamu.

Nada tarukur ampot dipagut ulok hamu tibu paboa hamu tu

doktor. Dibaen numma adong saragam daon ni bisa na binato ni doktor nipompahon tu pamatang ni na ni pagut ni ulak i.

61. Gompul

Halak Hindu na ro nangkin maroban gompul na lobi bolon. Gompul i na dung nipodaanna ma i manortor.

Muda hum disuru halak Hindu i do manortor manigor dia-bingsa ma patna jolo i dua-dua dipasumansa songon na manortor.

Sanga ise na giot manondur angkon manggarar do di nam-punasa i sapulu sen.

Tarik hamu daganak tu rohamuyu, salangkon gompul bina-tang harangan na riar laing hapodaon do mur ma halak.

62. Halihi

Nada hum misang dohot banggik musu ni manuk, halihi dope situuanna.

Muda hun magarayap-rayap do halihi di ginjang an mang-gorai ma manuk. Saguman manuk ma lamot-lamot maporus ma i marmonjapan.

Tuktuk dohot sisilon ni halihi i na bengkok boti na rantos. I ma parjinangkana halihi i bangso sipanyoro.

Halihi adong tolu ragam, sada halihi sigopak, paduana halihi bangar, patoluna halihi tungko.

Diboto hamu do sanga bia parasar ni halihi?

Hum na mangarugikon dehe halihi?

63. Losung Aek

Hapistaran dohot sinaloan do maroban jolma tu hasonangan.

Na jolo arian borngin nia-nia, bujing-bujing laning na mangae ma manduda. Taji dung mur mapistar halak diboto halak ma losung aek baen manduda.

Saonnari numma dung bahat losung aek di hita on. Nada be loja nia-nia dohot bujing-bujing manduda.

Antong nida madung dumpang hita gogo ni aek mangurupi baenonta atehe?

Mur tu dakdanak parpudi tu pudi on nida mur martamba ma diboto halahi markasayakon gogo ni aek.

64. Loba

Tutu man loga pandoit do i masuk habiaran ni jolma, tai na markasaya situtu do i. Dibaen sian loba do dumpang halak tangguli ni loba dohot pantis.

Hasaya ni pantis nada humpamantis ni bonang di halak na manjait, tai godang situtu hasaya di na mambatik songon di Pulo Jao.

Aek ni loba pe na jaji hasayana, boti baen panganon, boti baen daon.

Aha ma na tama daonan ni aek ni loba diboto hamu?

65. Pilo-pilo

Muda di hatika mamuro halak di saba sanga di hauma marragam ma dibaen halak di duru bope di tonga ni saba sanga hauma i pambiar-biari ni amporik dohot musu ni eme na asing.

Diparpajongjong halak ma halak-halak, dipansangotkon halak ma bulung mi hayu na tarbolak-bolak anso mambung-ambung muda ro haba-haba. Bahat muse ma dibaen halak pilo-pilo sanga piyar-piyar na godang na nenek anso marragam sorana. Adong na asok parnyekutna, adong muse na targogo.

Muda lolot boto hamu patangi-tangi sora ni pilo-pilo, mur ragam do i binege sorana. Duga hamu ma tangihon hamu saulakon.

66. Modomkon

Manuk sabur bintang ni halak si Rombo na lolot ma dung modomkon, Ganop ari do ditungkiri si Rombo tu sangkakna i, sanga na dung manapor ma. Na sogot dabo hum ngot si Rombo, dilojong ia muse ma manungkirsu tu sanggakna i. Didapot ia madung manapor, tai homang rohania nada anak ni manuk diida ia disi; anak ni itik do.

Bulus dilojong ia tu bagas mandoksa di inangnia, "Inang ma-

dung botoho manapor manukta sabur bintang i, tai itik do anakna. Songon di dehe i inang? Di na marayak modomkon i dabo manuk sabur bintang i hubuat sude pirana i. Bo hugontihon tu si pira ni manuk," ning inangnia i.

67. Busisa

Saborngin on bagas borngin ma ari anso tarpodom si Naning.

Tibu do nian ia gulung tu amak podomannia, tai haru dipapitpit ia pe matania nada tarpodom. Angke busisa sajo ia dibaen rarat rohania mada sanga bia do pangalahona singgolom na paduahon i. Sai sura-suraan ma ia sanga na dung disisenia, hara ni i laing busisa ma da si Naning. Jabat ma bagas borngin ari anso tarpodom ia.

68. Si Mopul

Jop do rohaniba paida-ida parange ni si Mopul. Muda hum binsar mata ni ari na dung sidung ma ia maridi. Na dung juguk maia. Buku parsiajaron disise ia. Sanga dia na dung dipodahon ni guru. Muda hum doteng do pukul pitu, langka ma ia tu sikola. Dihapit ia ma buku dohot batu suratonna.

Di tongan dalan naso ra do ia magatal songon dakdanak na asing-asing i.

Parabitoonia inda nian sai na godang arga tai haru pe songon i, sai hurang-hurangan do mataniba mangida ia. Angke maralo ma niida ias ni pamatangnia dohot ias ni parabitoonia. Inda hum i pajop roha mangida si Mopul, denggan ni parangenia do pe di sikola na lobi. Inda unjung ia targora harani margatal. Salaku laing na todas jana sonang ma mida parjuguknia patangi-tangi barang aha poda ni guru i.

Anggo si Mopul tola ma ia baen tudasan ni dakdanak. Sanga ise na mangihutkon parange dohot pangalaho ni si Mopul i, angkon laing dapotan hapistaran dohot sinaloan ma i.

69. Rondang bulan

Sun ma rondang ni bulan, langit i ias, bintang pe taru mari-

dopan, haba-haba mangombus asok-asok. Muda so iba di bagas, laing songon na adong pio-pio diiba mandokkon biasi laing juguk ho, ligi ma rondang ni bulanon nada ilip songon arian raya.

Rondang ni bulan i ma marontang asa haba-haba i ma songon na manguluhon laho-laho.

Riburan ma dakdanak di alaman. Adong na margala, adong na marsimonjap, adong na marsitogol. Ina-ina, bujing-bujing mambayui di alaman ni bagasna be. Adong muse antong na manduda. Di jae julu tarbege ma surak ni dakadanak asa rumiak-riak partatana. Doli-doli pahae pahulu marsioban rohana marende. Tai di sadu di alaman ni suhu i adong do dua pulu ama-ama marjuguhan. Hobaron ni halahi nada adong simbalikkon ni sanga bia binaen anso umbahat aek tu saba.

70. Manongos surat

Jamardoring asing do parrohaonna sian parroha ni bahatan ni halak hita. Anaknia na margoar si Moget nada dibaen ia marsikola di lambungnia. Tai disuru ia do marsikola dao tu huta na asing. Ia di bagasan ni roha ni Jamardoring, "Muda laing di lambungku dakdanakku hubaen marsikola laing margani-gani mai. Dia so dia ma giotna," ning rohania, "tai muda dung di huta ni halak nada be i songon i, marsipoda pe dao mai ruminggas.

Hara ni i ma anso disuru ia si Moget marsikola tu Bukittinggi. Saulak ro ma surat ni si Moget di amania i songon on ma hatana.

Manopotkon damang
Jamandoring saonnari
di Pargarutan.

Numma tolu taon au marsikola di Bukittinggi nada dope unjung au muli tu hita on. Anggo lungunna hulala sun ma. Ganop borngin laing na huipi do anggingku si Rame, tapi bo pe sun lungunna hulala muda huadopi parsiajaran, parsipodaan mago do i. On pe amang dok di dainang dohot di anggingku si Rame, horas be tondi madingin.

Santabi sian anakmu
Si Moget

71. Bada mambaen rugi

Saulak dompak ari onan langka ma sian huta bayò parjagal tuak dohot bayo parjagal saong, laho tu'onan.

Harani tardao do onan i sian huta ni halahi, jadi di tongan dalan maradian ma halahi santongkin laho mangkobar-kobari.

Ninna bayo parjagal tuak i, "Sai sun ma nian jolo milas ni ari sadari on, anso manguasi sudena halak paronan i. Anso tibu laku annon tuakkon," ning ia.

Ro bayo parjagal saong i mangkuling ma, "Ulang ma nian malogo ari sadari on. Sai por ma nian jolo udan anso tibu annon laku saong jagalonkon," ning ia.

Harani numma maralo pangidoan ni halahi, jadi bulus martangkangi ma halahi lopus marbada marsijamaan, marsiranggut, margutu-gutu. Jadi tartondong halahi ma garung ni tuak i sampak sudena asa tarlonca halahi saong jagalan i maropuk. Dung mantak halahi marbada rap ila be roha ni halahi, angke rap so adong be gadison ni halahi tu onan.

72. Dakdanak na oto

Saulak kehe ma si Manila mandongani inangnia tu pargadungan. Dung bolkas halahi disi, mambuati gadung ma inangnia i asa dioban halahi ma muli.

Dung di huta dibolgang halahi ma gadung i di bagasan hudon tanó. Jop ma roha ni si Manila mangankon gadung na dibolgang i mardongan harambir na nihuhur dohot gulo.

Torang ari tarsingot muse ma si Manila giot mangan gadung; jadi langka ma ia tu pargadungan. Dihuari ia ma pangkalian ni inangnia i. Digare ia tai umpe adong be dumpang ia habis hum batu onom bangkiang na sasabotohon. "On ma ibana gadung i," nin rohania asa ditompi ia muli. Dung ro di huta ia, dibaen ia ma tu hudon, dibolgang ia. Layak masak ma di rohania bo dibangkit ia ma. Jadi disarbut ia pir. "Na bia muse do gadung on, natuari dayuk do dung masak. On pir," ning rohania. Jadi diulakkon ia ma dibolgang ia, gara situtu ma apina dibaen ia anso tumibu masak di rohania.

Dung adong dua tolu ngombas, disonduk ia ma, bo dipisat ia laing pir. "Inang, amang gadung begu do on. Iba madung male ia umpe olo masak," ning ia. Bo diambungkan ia rap dohot hudon i. Dia gadung, dia batu umpe dijangka ia.

73. Hobar rarat

Sanoli haudanan ma si Porda dohot si Suhul. Jadi maradian halahi tu bagas ni anakboru na mahal giot marsidudung. Tarida ma di si Porda gantung samayang pisang sitambatua na hum mamungka giot malamun dope. Giot dipangido ia alang rohania, betak ila rohania nada dilehen anakboru i.

Jadi didok ia ma di si Suhul, "O Suhul, tangihon hobar-kobaran halilianta na marsidudung on," ning ia. Roning si Porda ma, "Muda songon dompak ari paru ... iba dompak ngali-ngali ... tama sugari manutung-nutung pi . . ."

Hum dibege anakboru i songon i, nilang hamu ale disi markata ni amlungan. Nada hulehen pisangki tutung-tutungon muyu. Giot paisirangku i baya, ning anakboru i. Sip doma si Porda mamolngit.

74. Na somak

Adong dua dakdanak goarna si Jonggi dohot si Basung. Kehe halahi mangkail tu Batang Angkola. Harani madung diboto halahi humani dapotan do halahi, jadi dioban halahi hinan ma indahan ni halahi satukna di halahi.

Dung adong ma satonga ari halahi na mangkail i, bahat ma antong dumpang halahi, haporas, garing, dohot baung. Deba na lamot-lamot, bahat muse antong na balga-balga. Harani si Jonggi ma na tumobang, umbisuk ma ia ulang si Basung. Jadi mangarohai ma si Jonggi songon on, hupaoto-oto doma jolo dongankon, ning rohania. Jadi mangkuling ma si Jonggi, "O Basung, songon on ma ale tabaen parbagi ni gulaenta on. Sudena gulaen i tatutung anso tapangan, tai saguman na tigor annon gulaen i ma tumpukmu asa saguman na marbengkukan di au ma i," ning ia.

Bo ditutung halahi ma da sudena gulaen i. Jadi dung masak

dipayakkon halahi ma sudena di bulung pisang, tai niligi sudena gulaen i umpe sada na tigor, salaku na marbengkuan do sudena.

Ro ning si Basung, "Jonggi, ulang aha rohamu ale, angke nada taruli ho gulaen on. Angke na marbengkuan do sudena. Padanta pe saguman na tigor do tumpukmu. Dedean doma si Jonggi manot-noti si Basung na manonduti gulaen i.

75. Sala hosing

Adong bayo na oto giot kehe ia maroban jagalnia tu huta na balok. Jagalnia i nada diujung ia sanga ditompi ia, tai dihindung ia do.

Di tongan dalan mangampir ma da abarania siamun. Jadi giot paimbar haldungannia i ma ia tu abara siambirangnia. Jadi dihatiha giot paimbarsa ma ia nada be hum haldungannia i dipaimbar ia tu siambirang, tai markosing muse do dohot pamatangnia mangihut. Dung dipaimbar ia haldungannia i tu siambirang, nada diboto ia hape na dung mulak adop i do ia.

Jadi didatdati ia ma mardalan. Lolot-lolot adong ma huta diida ia. Huta i songon hutania i do. Dung dibolus-bolus ia tonga-tonga ni huta i, tarida disia tar songon dakdanaknia.

Jadi dibaen madung male ia mangkuling ma ia tu dadaborunia i, "Ra dehe ale hamu mardahan di au, angke sian na sogot naso mangan dope au," ning ia. Hum didok ia hata "hamu" di dada-borunia i, "Na lalaen do ho aropku", ning ia.

Hobaron on mandok naso binoto ni bayo i do hapengani na mulak tu pudi; ia mulak tu hutania. Huta ni dadaborunia asa dakdanaknia pe umpe dijangka ia.

On ma sada bayo na poranna.

76. Manyirai bona ni pahu.

Si Garugur langka mebat tu huta ni tulangnia na margoar Lataijuk. Adong do bariba bulan ia disi mangan modom di bagas ni tulangnia i. Na jotjot ma halahi maringkayu pahu marpangaronca budu Sibolga. Rupana naso unjung dope si Garugur mangan pahu di halahi an. Harani i bo disapai ia ma nantulangnia i, sanga bia

binaen panggule ni pahu anso songon i tabona. Ro dok ni nantulangnia i, "Nada pola bia da panggule ni i bere. Hum marsantan marsira ma ia binaen. Tai i do tutu, muda hatiha adong dapot pangaronca binaen pangaroncana," ning ia.

Dung tarbege ma di si Garugur songon i, jadi mangarohai ma ia, "Na oto ma antong nantulangkon. Ganop mardahan laing tong mangkuhur harambir, laing tong manyirai ingkayu. Sugari sura saulak dung binaen huboto karejo i mahua," ninna rohana. Jadi bulus markas ma ia mangkuhur harambir bahat-bahat asa diporo ia mambuat santanna. Dung gok onom garigit asa disirai ia ma sudena. Dung sun songon i langka ma ia tu pancalongan ni nantulangnia i. Bo diduruskon ia ma sude santan i tu bona ni pahu i. Bo muli ma ia.

"O, nantulang, indangkon be sai rusak hamu manyantani bope manyirai ingkayu pahu tupudion, angke madung husantani asa husirai humani sudena bona ni pahu saguman na somal pancalonganmuyu i," ning ia. Mambege i gonggong ma nantulangnia martata jabat tarilu-ilu.

77. Mamolgang huting

Mamungka sian na boltok dope lopus tu na bibi eme ni boru Munte, laing na marpupu ma dipapangani monci. Harani i sun ma marsak ni rohania. Jadi dioban ia ma hutingnia i tu sabania i anso margiloan bope dipapanganisa monci i sudena. Lalu ditadingkon ia disi huting i saborngin. Torang arina ro ma ia manyogot-nyogot. Didapot ia numma humitir hutingnia i harani ngalina, dibaen saborngin i ro lakna udan na lobi por. Boti umpe adong sopo ni boru Munte di saba i.

"Ois le baya, numma baya ngalian ho Kuring," ning ia mandok hutingnia i. Jadi bulus dipamilas ia aek sahuali. Dung gurgur aek i, dibuat ia hutingnia i nironjomkon ia tubagasan ni huai, aha dope mate ma antong hutingnia i jokal. Dung ngilngil hutingnia i di bagasan huai i, mangkuling ma boru Munte, "Bo saonnari jop ma rohamu atehe Kuring. Madung sai martata ho huida. Tarida iponmu dohot surat-suratanmu," ning ia.

Dung ro na nisondukkon ni boru Munte i tu saba i, muruk-

muruk ma ia di boru Munte harani oto ni sorangannia i.

78. Parpahan na madabu

Adong doli-doli si parmahan horbo di tonga ni jalangan. Saulak tarpodom ia lakna, bo rarat horbonia i sarsar. Dung ngot ia inda be antong be madung puyut dison. "Madung mago horbo sudena," ning rohania. Ditatap ia sangkaliang nada be diida ia. horbonia i. Angke lakna dampak manjampal sudena horbo i, di tonga-tonga ni ri na bagas dohot sarang nijaji. Bo manaek ma ia tu bona ni goring-goring. Dung di ginjang ia, diranga ia tu jae tu julu, jadi tarida ma disia horbonia i sudena. Hape dampak manjampali di adu di jae an. Harani moga ni rohania marsitopap mada ia manortor-nortor. Nada piga dan bo madabu ia tu toru songon dia sibodak bubuk na malamun, magas haehaenia jabat tarkatos ia. Dung ummaha dilala ia, didok ia ma, "Hape tutu do na nidok ni na tobang-tobang i nada marsara hatotorkis dohot nyae, siriaon dohot siluluton ning ia.

79. Pamorsan na barat

Narobi taran so marulando hita sudena, huta na nihandang do humaliang dohot bulu aor duri. Hasayana anso ulang tarbaen musu masuk tu huta. Jadi binaen ma pintu horbangan dalan haruar masuk tu huta i. Bolakna nada jabat sangkolak; pintu horbangan i pe antong na sun togu muse do i.

Saulak adong ma bayo na tarhurang rohana, kehe ia tu harangan martoktok baen urur. Marayak potang ari muli ma ia. Diporsan ia ma adong sampulu arur i. Tai pamorsannia nada bujur songon na somal, mamarat do. Laho masuk ia di pintu horbangan i, sangkot ma urur i, harani na barat i pamorsanna. Jadi humusohuso ma ia mangarohaisa, laing so diboto ia do sanga bia dibaen ia anso tampil doma urur i. Nada piga dan ro ma ina-ina na giot muhat. Jadi disapai ia ma ina-ina i, "Bia doma ale hubaen anso taroban au urur on tu huta," ning ia.

Ro ma ina-ina i, "Ulang barat dabo pamorsanmu, pabujur do," ning ia. Dung i pe anso lalu bayo i masuk tu hutania maroban

urur i.

80. Na oto dohot halinuna

Dua dakdanak kehe manimba tu saba Pidoli. Nada sadia lolot haliha na manimba i, dumpang halahi ma bahat gulaen haruting, tingkalang dohot siroken adong do tolu susukan.

Ro na godangna i, "Ia bo kehe ma ho jumolo anggi muli. Lehen gulaen on di inanta, anso dipamasak ia. Tai anggi nada iba tola maholit. Muda adong halak mangido di ho lehen pinomat sada," ning ia. Langka ma da na ummenekna i muli maroban gulaen i. Di tongan dalan i manaili ma ia tu pudi. Diida ia ma halinunia. Jadi diambang ia ma i halak na ro mangido gulaen. Bo dilehen ia ma da haruting i sada. Dung i dipupu ia ma mardalan.

Tongkin nari manaili muse ma ia tu pudi. Tarpaida muse ma disia halinunia. On pe lakna laing na ro mangido ma on ning rohana.

Bo dilehen ia muse sada. Laing songon i ma marpupu dilehen ia gulaen i di halinunia lopus. Sude gulehen i didotdati ia mardalan. Ditailihon ia tu pudi laing diida ia halinunia i. Jadi mangarohai ma ia. On ma dung sude gulaen aha doma luani hulehen di bayo na mangido on ning rohama.

Aha dope boto hamu bo ditalgang ia saraorna, dilehen ia di halinunia i. Dung sun songon i bolkos ma da ia tu huta marsaemara. Gonggong sude halak na mangida sa.

81. Pardahan na oto

Si Gorga numma bujing na samperudang.

Anggo mangida panggodangna layak malo ma ia pangalaho ni namambayu dohot mardalan bope martonun.

Tai nada songon i si Gorga na oto do. Harani sian menek laing so dipodai inangnia do ia sinaloan mambayu bope mardahan rongkon martonun.

Saulak didok inangnia i ma disia, "O Gorga, au inang giot kehe tu saba saonnari. Hudon dompak doho. Muda gura ma annon oroi jolo da, ning inangnia."

Hum kehe inangnia i sai diombusi ia ma api i. Jadi taran so gura dope indahan i dipadolugos ia ma pinggolna tu dalihan i manangihon sanga na dung gugur ma. Tai laing so gugur do.

Betak na hurang dolngos do panangihonku ning rahama. Jadi dipodolngos ia ma ulunia tu dalihon i bo gor obuknia sudena.

82. Mambiar-biari

Muda hum tangis do sanga ise sian pomparan ni boru Tubara laing na nipambiar-biari.

Ulang ho sai tangis da ro naron begu solopan sai ning ia ma i mambiar-biari pomparanna sanga ise na tangis. Hulul dihobarkon ia dohot gabus pangalaho ni begu sumangot dohot sinaku na olo mamunu halak. Jadi antong porsaya ma sudena dakdanak ma i taringot tu pangalaho ni si songon i.

Saulak borngin mardandi mangan ma sada pomparannia. Laing marpupu tangis asok-asok. Marsak ma roha ni boru Tubara hara ni nada olo niapoan.

Kehe ma da boru Tubara tu sasaring. Dilapu ia bohi, hurum, igung asa topi ni matania sudena dohot siragong ni hudon. Taru marjamenggot doma antong.

Dung songon i ditek-tek ia pintu ni halahi. Jadi masuk ma ia tu bagasan bagas i. Dipabolnang-bolnang ia ma matania laho dipangangang ia pamanganna. Boti mandela-delai ia. Hum tarida songon i di pomparannia na mardandi mangan nangkin bulus mangangguk ma dakdanak i tarsongot, dibaen diambang ia begu sanga sinaku ma i. Harani sun biarna bulus unggal do ma danak i patumongguhon lalu malongos ma angin sipurpuronna.

Sun ma solsol ni boru Tubara, harani pambaenannia naso tama i.

83. Huling-kulingan

"Mare hita ale nahut markuling-kulingan halilianta panite so modom," ning si Tabas.

"Mahua i," ning si Rahut.

Jadi didok si Tabas ma,

"Huling-kulingansa".

"Ansa," ning si Rahut.

"Naso adong ni jalahan, dung dumpang mambungan, aha ma i."

"Nada huboto i, tai panite anso hutobus," ning si Rahut.

"Huling-kuling anca."

"Anca," ning si Tabas.

"Mungkona tubu sian bahan holi-holina padua halihon tubu sian bagasan holi-hili, aha ma i."

"Au pe nada huboti i dok ma umpama partobus," ning si Tabas mandok si Rahut.

"Pira manuk do i," ning si Rahut.

Ro ning si Tabas, "Anggo huling-kulinganki na manyigipi janggut do," ning sia.

84. Marun

Di ari rayo nabaru salpu i taru ribuan ma halak pahaepalulu. Ragam do ma niida pangaloho ni halak.

Adong na lalatan di parabiton, adong deba na hum mijur sabogas, manaek sabogas baenonna.

Si Mesa anak ni Jamarsuncang nada ro didia ia. Solaku hum mijur sabogas manaek sabogas do baenonna. Hum di ari na sodari i nada hurang tonga lima pulampantik lomang dipangan ia. So dokonon panggelong dohot na asing-asing. Songon pandoknia, "Halak mar ari rayo butuka do," ning ia.

Tolu ari do dung ari rayo i magis-magis ma pamotang ni si Mesa. Potang ari bulus marun ma ia. Milasna sun jabat saban-sabanon ia patunyanyaon.

Maruntung do pe si Mesa angke bulus jalop dipainumkon doktor disia pangaruk-ruhi sanga pambulus. Sugari sura betak na mate do ia. Nada binoto salangkon i adong do tolu ari ia marun-marun.

85. Markuayam

Muda tuk ma di hatika na halak giot modom, jotjot ma i maruayam. Jadi na markuayam i, i ma sada parjinongka na dung

mangido mata giot modom.

Bahat do halak na sala markuayam. Taru dipangangang ia sagogoma pamangannia. Na songon i jotjot marmara.

Naoni di Tanjung Medan na di luat Gunung Borngin adong sada disi halak Lubu goarna Parauloklok sala lakna parkuayamma. Mangangangtu pamangannia. Aha dope sili lakna kunci-kunci ni pardomuan ni isang-isang partom dohot parginjang i. Bo nada be tarpaulak ia singom pamangannia songon na somal.

Salaku laing na ngangang do ma songon i. Anggo haneitna dilala Parau laklak nada be na tarkobarkon.

Didok parkouman ni Parau laklak na dung nidamporkon ni begu do i harani i langka ma halahi manopot hasalaan ni Paraulaklak, "I tutu karangan na begun, sai haru pe songon ni laing so olo do mulak denggan pamangan ni Paraulaklak i.

Lolot-lolot dioban holohi ma Parau laklak manapot doktor tu Panyabungan. Dung di patingkos doktor i sude pangalahona bo dipauli doktor i ma. Nada piga dan bulus denggan ma mulak pamangan ni Paraulaklak i.

86. Mapantuntu

Ro udan potir mandahayu.

Hatika i lakna si Hasona dompak di sopo godang juguk mangarit-arit hotang baenan bide. Tulangna Jakualo pe laing di sopo godang i dompak markos mambaen bide na giot obanon patoluna tu onan.

Manaili ma da si Hasona tu tulangnia i. Bo tarida ma disia songgop lanok donokkon salibon ni tulangnia i. Jadi didok si Hasona ma, "O Lanok taro na so umboto adat do lakna ho puragamu songgop di bohi ni halak tulangku. Nada he diboto ho pantang na so tola sitik na so jadi sala. Au ma nada puluk au mangalintosi ulu ni halak tulangku, mur ma ho. On pe morot ko tibu sian bohi ni halahi," ning ia.

Tai hom aha pe dipardok si Hasona nada diboto lanok i. Laing dipupusa mangintir-intir di bohi ni Jakualo. Harani nada diampirkon lanok i, hatania ia milas ma da rohana. Bo dibuat ia sogadon. Dipotukkon ia marapi-api tu lanok i. Diambang si Hasona

na mamunu lanok i ia, hapengani bohi ni tulangnia do marbosar boti margombang, harani mosok dibaen banggar ni sagadon i.

87. Na padot

Jakutnya ama ni si Hapesong, i ma sada halak na padot. Sanga aha na niparambungkon ni halak, muda layak adong hasayana ni lala ia na bulus nijoloannia do i dimomos ia denggan.

Saulak marlaho-laho ma Jakutnya di hutania i. Dibolus-bolus ia ma sangkaliang. Jadi tarida ma disia bahat takar na niparambungkon ni halak. Bo dipambuati ia ma sudena takar i dioban ia tu bagasnian. Di na manyarat-nyarat susuhan ni takar i ia padumpang ma ia dohot halak Koling. Digadis ho do ale takarmon. Muda digadis ho anso hutobusi satali saratus, ning ia. Mahua i ning Jakutnya. Jadi di gadis ia mabulus takar i sudena di halak Koling i. Harani opat ratus takarnia i, jadi manjagit ma Jakutnya pitis sarupia. I ma upa ni padotnia i.

Laing na homang do roha ni Jakutnya dibaen otona deba halak hita. Diparambungkon na tarbaen jadi pitis.

88. Martondung

Sanoli kehe ma Nai Tarolo maridi tu tapian. Di hatiha na laho manolgang abitnia ia, ditalgang ia lakna tintin suasania na marmarmata na godang arga. Dipayakkon ia di lambung ni abitnia i. Dung simpul ia maridi marabit ma ia asa muli ma ia. Tai tintin i lupa ia mambuatsa. Bo laing tading ma disi. Jabat tolu jom dung tading, anso diingot ia na dung tading tintinnia i di tapian an. Bulus marlojong do ia nian mangulakkonsa tu tapian i, tai nada be disi tintin i, madung dibuat halak. Langka ma Nai Tarolo patondungkonsa, tu Lobe Tohir na malo martondung. Jadi didok Lobe Tohir ma, "Anggo di bagasan tondungku nada na mago tintin i, tai sannari dadaboru do marmomossa di holang-kolang ni toru dohot ginjang," ning ia.

Songon on mada tondung ni halak, hum gabus do dipardoksa paoto-oto halak na oto.

89. Halak na oto marparau

Na dangol ma muda halak naso unjung mangida laut. Saulak kehe ma halak Pagur mangaranto tu Siboga. Jadi sian Lumut marparau ma ia pahae di batang aek Lumut rap dohot parparau i.

Anggo sian Lumut nian tu Jago-jago nada dope songon dia lomos ni rohania, angke laing batang aek na somal dope. Tai dung bolkas tu Jago-jago sun ma biarnia. Angke disi ma matumona pahombang rayar. Harani sinalomos dohot sinabiarna ia, nada be puluk ia mangkuling-kuling. Salaku sip doma ia.

Hum marrayar dabo sian Jago-jago, madung di tonga laut i bo taldus lakna tintinnia madabu tu laut i. Jadi bulus dibuat ia rautnia dihorot ia saotik topi mi parau i baen parjinangka di sia. Tontang ni pangkorotannia i ma hadabuan ni tintin i ning rohania. Dung maradian annon parau on huhonongi doma tehe tintinki di tontang ni pangkorotankon. Anggo saonnari nada dope tarbaen, angke hatiha markas dope parau on mardalan, ning rohania.

Dung disapai parparau i sanga aha honongonnia tintinnia ning ia. Jadi rumiyak-riyak ma halahi sudena martata umbege haotoan ni bayo i.

90. Udutna

Anso mur tangkas di hamu ale dakdanak, hape na lobi dangol muda naso umboto, na bile situtu ma muda na oto di toru on, hujamitahon muse ma di hamu, raja na oto marparau.

Adong ma da namora sian luat Batangtoru kehe tu Sibolga. Dung dabo dihombang ma rayar salpu Jago-jago saotik, jadi mangkuling ma namora nangkinan di si paraparau i. "Hamu ale dongan bope au di luat Sibolga songon on laing na binoto ni halak do au namora, bako paradat di hami an. Indangkon sai panaekkon mandera na bontar hamu pasangapkon harorongku tu Sibolga," ning ia.

Jadi mangalus ma parparau i, "Ulang hamu gusar laning taida morangku. Nada mandera na giot pasangap sinamoraanta on anso ni hombang, tai rayar do i anso adong tomtoman ni haba-

haba padalan paraunta on anso tibu hita bolkas tu Sibolga," ning bayo i. Harani i sun ma ilana roha ni bayo na oto i.

91. Mangorar

Adong sada danakdoli doli-doli disuru amangnia ia mar-sikola hatukangan bosu tu Surabaya. Danak i lakna na lobi parabur. Muda hum mantak do ia marguru martukang na bulus kehe ma ia rap dohot angka dongan-dongannia jalang pahae pahulu marsude-sude pitis.

Madung ditongos natobangnia di sia surat mandok ulan be sai marabur ia. Tai nada tarantak ia be sai marabur ia, nada tarantak ia be ate-aten pulik madung maila ia mangantaksa.

Saulak lakna dompak nada be marpitis danak i ro ma da suratnia tu amangnia mangido pitis baen balanjo marguru hatukangan. Jadi dibalos amangnia ma suratnia i. Nada hulehen be pitis di ho, angke sai adong, sai do bulus diparsude ho ning amangnia.

Manise surat ni amangnia i, ro ma sada bisuk di rohania. "Huogar jolo damang anso ra doma ia manonges pitis di au," ning rohania.

Bo dibaen ia muse ma surat tu amangnia i hatana pondok sangon on, "Tongos pitis di au tibu. Muda so adong pitis pestol ma tongoskon ning ia."

Dung dijagit amangnia i surat ni anakna i bulus dibotosa do hata ogar-ogar do i. Jadi ditongos ia bulus pestol na nipangidona i.

Hum dung dijagit danak i pestol i mangkuling ma ia nada hape tarpaoto-oto au damang ning rohania. Dung i dipatumona ia ma pauba paraburnia i. Diantok ia ma na jalang pahae pahulu marsude-sude pitis. Hum na marguru hatukangan i doma na ning-gomosannia.

92. Ende

Mandurung au jolo
Ulang dok lape-lapengku
Marende au jolo
Ulang dok sina gabengku



Iyap-iyap parupuk
Na solot di sopo saba
Holi-holi mapukpuk
Na nikopkop aha suada
Na candit ma na porkot
Na dung dongdong gabe siala
Na hancit asa ngotngot
Na dung adong gabe suada
Musiunan borgot luli
Dongan ni borgor harangan
Ronjom tangan marburi
Diila halak pinggan panganan
Magodang pe ambasang
Na magodang di parsariran
Magodang pe pematang
Na magodang di parhancitan
Sabolas hasurungan
Sambilan tu dua pulu
Tarolat paruntungan
Sian dongan na dua tolu
Lasiak ni roburan
Bolas mardangka pe suada
Na siak panomuan
Bolas marhata pe suada
Nisua imot-imot
Songon parbunga ni sibaguri
Tagi hamu di sipaingot
Nada podaan unte marduri
Sajongkal dope pahu
Na nitinggang ni pangaritan
Sajongkal dope au
Na nitinggang ni parhancitan
Hambeng ni sutan Garang
Manangkok marrante bosu
Nararang nada tarrarang
Angkon mate anso losi

93. Mangkopok

Hum potang sidumodang ari sonja na di topi ni langit i pe numma mago halak dompak kariburonna marmangananan dopong-dopong ma da sora ni doal.

Marsipan hamu dakdanak anso tatangihon sanga aha hata ni niho-niho ni moranta . . .

Di ari ma ancogot halaklahi dadaboru na godang na menek ulang so marlogut tu sopo siyo rancang magodang

"Na mandok songon dia dehe amang padalanan hopok na ni dok ni niho-niho i," ningi si Juana mandok amangnia.

Nada he dibege ho bonggal na magoan golang sere Nai Onbu songon ni latongbalian. Madung dua dua onan laing so dumpang do golang i na manangkosa pe umpe binoto taram ni roha pe nada adong. Jadi madung malap datu na lo mangkopak sian berbaran. Ancogot ma di sopo siyo rancangmagodang an ni hopak hita na sahuta on ancogot binoto ma sanga ise na manangko golang i ning Aman Juana.

Bia ma he parbinotoan i ning si Juana mandok amangnia.

Ancogot di sopo godang an adong ma i santan, sipulut na dung nijampi ni datu i. Jadi jojol ma halak sude ancogot mangan-kon santan sipulut i. Sanga ise sitangko golang i nada i tarbondut ia santan sipulut i. Salaku lokot doma i di bagasan pamanganna ningi Aman Juana.

Au pe ulang ho muruk di au, ate na ma umbahat di au santan sipulut i ancogot, angke naso mabiar do au nihopok nada au sitangko golang i.

94. Na ingol sabagas

Bagas ni Japarira punjung di topi dalan. Na marsaripe tolu Japarira, sorangannia dohot sude pomparannia na ingol.

Di na tarbakta raja ro ma bayo mamolus tu alaman ni bagas i. "Dia do ale on dalan tu Maga dia dalan tu Purba?" ning ia.

Ro ning dahak i, "Anggo hambengnami jantan i nadã gadison, tai anggo boru-boru i gadison do, tai bo songon i husapai jolo dainang," ning ia.

Hanangku paolo-olo danak na ingol songon on ning roha ni bayo i laho kehe. Hum langka bayo mamolus i kehe ma danak i tu kobun mandapotkon inangnia. Dung donok ma ia di lambung ni inangnia i mangkuling ma ia, "O inang bia dehe aropmu tagodis do hambeng jantan i," ning ia.

Mangalus ma inangnia i "Angkon sae basaen ni amangni ma lakna diparbasaen ho. Husapai jolo annon amangmu sanga tola do," ning ia.

Di bagasan na mangkobar-kobar dope ia dohot anakna i pajala jelu songon i ro ma Japarira sian saba porsan pangkurna.

Jadi manaili sorangannia i adop i laho mangkuling, "Atehe antong ama ni jolo santongkin basaenmi diparbasaen anakta ning ia.

Ro Japarira, Nada maroban gulaen an ale. Naso adong do gulaen di saba," ning ia.

95. Sapitis nibagi lima

Antargan danak boto hamu Jasulangat na dung marsikola do ia. Anggo pandok ni gurunia i na dung tuk hapistarannia na marsikola i.

Dunga mantak na jolo Jasulangat marsikola nada barindok rohania giot mangan gaji sanga giot mangaranto tu doli. Tai sina-loan dohot hapistaran i diombankon ia do manjama tano. Adong do antong sabana pitu lungguk, tobat dohot kobunia pe adong muse do. Nada unjung haleon Jasulangat. Parabitonnia na lima simanjunjung i pe togu-togu do pomparannia i. Lima-limana rap na dung marsikola ma.

Sanoli dabo borngin antargon so masak indahan didok Jasulangat ma pomparannia i lima-limana, "O dakdanak, hamu na lima madung rap marsikola. Duga hamu na jolo bagi hamu na lima pitisna sapitis on. Antusanna dos be tumpukmuyu. Tai ba nada tola jolo nitobuskon barang tu aha hepeng na sapitis i tu adopan ni dakdanak na lima i.

Aha dope gaor do ma da dakdanak i marsidok hatana tai sada pe halahi suada na malo marbagi hepeng na sapitis i. Jasulangot pe nada olo mandoksa sanga bia binaen parbagina.

Hamu pe dakdanak duga hamu do jolo rohai hamu sanga songon dia dibaen parbagi ni hepeng na sapitis.

96. Jaksa na bisuk

Adong sada halak Koling baenanna mangari-arohon daon-daon jagalannia.

Dompok halasanna ari di na maningkos arian raya loja ma ia boti antong madung mamandur hodoknia. Kehe ma ia da maradiah tu toru pamispison ni halak Cino tukang kangso.

Nada piga dan dung juguk ia marsapa ma Cino nampuna bogos i sanga aha do na ni paoban-obania i. Jadi didok ia ma, "Daon do i baen gadison."

Ro alus ni Cino i, "Daon aha muse ma he na binotomuyu halak Koling hum na giot paoto-otohon halak do hamu daon na simartur," ning ia.

Mambege hata ni Cino i siar ma da halak Koling i boti mamurai ma ia, jabat ma dipardok ia naso sidohorndonon.

"Inang, amang gahgah ni Koling on, ale inang," ning ia Cino i laho giot mamingkok halak Koling i. Giot jamaon ni Cino i ma ia bulus dipagayang ia ibania marbuncilakon. Dibaen ia matania songon dia halak na giot mangaluahon hosa.

Langan noma Cino i sun ma biarna. "Umpe dope huantuk numma mate songon on. Anggo au da na uhumon noma au," ninna rohania.

Nada piga gombas ro ma jaksa paresohonsa. Disapai jaksa i sanga na nihahua ni Cino i halak Koling i.

Ro ninna Cino i, "Hum giot hujama dope dipaunggal ia ma bulus ibania."

Didok jaksa i ma di hupos nia, "Ungkop jolo saraor ni Koling ma marunyaen on, so hupareso nyaena."

Hum dijama hupas i sarusur ni saraorna i bulus juguk ma Koling i. Indangkon be nipareso, numma ummurok hulala ning ia. Jadi gonggong na humaliang i sudena martata.

97. Gabus alo ni gabus

Inda adong be na ummora ulang rajanami raja Jao. Muda

Markorja raja i jabat do pitu-pitu ratus horbo dohot lombu dibunu ia panganon ni situan na toropnia na mora i sorangan ni rajanami i salipina na lobi bolon. Sugari mamonjat babiat na maranak poso di bagason gambir na di salipi i naso tarida do i na lobina. Bagasiano rencamagodang ni raja i dope na bolonna. Sugari sura bingkas ma porang di pantar ruar ni bagas i tolu bulan na so bonggal dope i tu pantar pudi ni bagas i. Songon i ma da sinamoraanna rajanami i ning halak Jao sada mandok bayo halak daret. Markobar-kobari do jambatan Batang Turu laho pahitir-hitir totna.

Nada dope da boto ho na sun sinamoraan dohot sinarajaan ni rajanami dao dope rumaja boti ummora rajanami Tuangku Pagarruyung di tano deret na robi nungi halak ning ia.

Rajanami i muda markoja hum pajongjong dalihan sajo tolu bulan. Dung i bolon-bolon ni hudon dohot balangana Pasilang do parau di bagasan. Manggaor-gaor indahan dohot ingkayu i holi-holi ni horbo, lombu, dohot hambeng songon dia tor doma. Unjung do boto ho narobi magargar hurkur ni indahan disi mate halak dua ratus, ditinggangisa," ning ia mandok bayo halak Jao i.

Sip doma halak Jao i mansolngit ila rohania.

98. Manangko podoman

Tonga dua pulu ari ma lolotna dung nada marsikola si Bonban, angke laing na marun do ia. Arunnia arun na mangkolang-kolangi. Madung nyiang situtu si Bonban, hurum i langan doma songon mare-mare pinaspas.

Dibaen naso adong i doktor di huta ni halahi i, hum datu halak kita doma ditopot ama ni si Bonban mandaoni anaknia i. Ragam ma daon na dung diparbaen ni angka datu i, sai umpe adong na mangasi. Natuari andospotang i kehe lakna guru i manungkir nyae ni si Bonban i. Dung ro guru i tu bagas ni halak si Bonban, didok guru di ama dohot di inang ni si Bonban "Bia he sugari sura nioban jolo si Bonban on manangko podoman," ning ia. Ro alus ni Ama ni si Bonban, "Au petehe niduga doma jolo songon i ampot ra ummurak," ninna ama ni si Bonban.

"Ah Amang, ulang da oban au manangko podoman. Naso

tola do baenon manangko," ning si Bonban.

Bulus guru i do mangalusi hata ni si Bonban i. "O Bonban, na nidok manangko podoman idabo nada i na manangko manjemut, tai mandok paimbar inganan do tu bagas na asing. Muda dumenggan angin di bagas na asing i, muda dumenggan disi angin-na, ra tumibu ummurak nyae i. I do nanidok manangko podoman," ning guru i.

"Antong laning taida olo do au ango songoni," ning si Bonban. Hum lima ari dope dung na manangko podoman i si Bonban mantak ma arunnia i. Ia pe antong mulak ma marsikola songon andigan.

99. Surat bulung-bulung

Nabaruan ro surat ni guru sikola manambin di guru i. Dung diungkap guru i surat i umpe adong bagi aha isina, haliskon dua ragam bulung-bulung lutlut dohot game-game.

Mangkuling ma guru i adop kami, "O dakdanak, ligi hamu ma on, adong dison hujagit dua ragam bulung-bulung lutlut dohot game-game tongosan ni guru i sian manambin. Inda adong bage aha be isina surat on haliskon na dua ragam on. Bia do aropmuyu na mandok songon dia do on," ning guru mandok hami sudena. Umpe sada hami na umbotosa sanga na mandok dia i, salaku homang do ma hami sude paroha-rohaisa.

Dung rap marsipan doma hami sudena didok guru i ma, "Di hani on boto hamu dakdanak, haru pe on hum bulung-bulung na marantusan do on. Tangihon hamu ma denggan-denggan anso husise:

Lutlut ni habaoran
Game-game ni Padangbolak
Songon on ma pardangolan
Dia ma dalan diingot halak.

Ningi guru i ma mandok hami laho ditiop ia lutlut dohot game-game i. Dungi dope anso tangkas hami boto. Hapengani hum bulung-bulung pe nitongas bolas do gabe ende muda rap na malo patama-tamasa.

100. Nyae na mangalangkoti

Di onan na baru salpu i, marsipaingot guru i di hami anso jaga hami di saguman nyae na mangalangkoti. Didok guru i, na jajian nyae ni halak na ra mangalangkoti songon puru, uris halimata, hurap, solpot, pungpung, songe, angka nyae na asing-asing dope.

Nada tola ningi guru i ni hombar halak na marnyae saguman na olo mangalangkoti. Muda nihombar ra do lokot nyaena i tu iba.

Na situtuna pandok ni guru i, halak na hona abar ma naso tola ni hombar. Angke lakna na tibu situtu do popar simu ni abar i. Harani i ma, muda adong halak na hona abar, ulang iba kehe tu ingananna i.

Bahat do halak naso porsaya na adong nyae na olo mangalangkoti. Dibaen i ma anso bahat do halak hona abar muda masa abar ningi guru i.

Jop ni rohanami patangi-tangi sipaingot ni guru i sun ma. Angke dung i dope anso hami boto, hapengani na jajian do nyae na olo mangalangkoti. Dung i muse hape, naso tola do hombaron halak na marnyae na songon i.

101. Manggoar-goari binatang

Halak parkauma bope parsaba na pantunan halahi di monci. Hara ni biar ni halahi ampot diparsudasa eme bope suan-suanan ni halahi na asing. Hara ni i ma boto hamu na ra do halahi mandok monci, angke i ma goar danak ni halahi. Muda giot mandok monci halahi, marragam do didok halahi goarna: rotap, naitoru, dongan sabagas, sidua gugut, amporik tano, ulok-ulok. Hata na songon i boto hamu hata panggoar-goari do i. Muda pantun iba di monci nada be olo ia manyegohon suan-suanan ninna roha ni halak.

Pangarohai songon i, pangarohai halak na oto do i. Didia ma he tarantak monci mangan eme. Muda tarantak monci mangan eme, inda be tarantak jolma mangan indahan. Muda ulang giot diparsude monci ememuyu, sae baen hamu duru ni sabamuyu gaduna, sibatangina, dohot tonga ni lupakna. Dungi palua hamu tu tonga ememuyu huting anso maporus sude monci i.

Diboto hamu do dakdanak sanga binatang aha na nigoar-

goaran ni halak na hudok di toru on:
namora dangka
namora padang
ursa galoga
sutan manjomak

102. Manangkal

Hum runcang dope ame ni Lambe Sao Malos kehe ma ia manopot datu pabaenkon tangkal ni emenia i, anso ulang dipangan musuna. Pulungan ni tangkal i dibaen datu i damuan na marisi barerang. Na bahatan dope-singkop halahi damuan rongkon bare-rangna i joor saotik be. Juguk ma datu markombangsila papitpit matana laho marmintora ma ia. Dimintorai ia ma pulungan nangkin. Dung simpul dimintorai ia didok ia ma di Lambe So Malos, "Damuan on sudena digampitkon ma on di galoga, dipajongjong di tano i markaliang duru ni eme i. Tai sanga didia bahal disi tar-nipasosot damuan on," ning datu i.

Dung marburangir datu i muli ma antong Lambe So Malos. Dioban ia ma pulungan panangkal nagkinan. Hum bolkas ia ro di hauma dialap ia antong galoga. Adong do tolu haol-kaolan, digotapi ia ma galoga i ruhut sasaeto ginjangna dibaen ia. Dipargampitkon ia ma sude damuan i di ujung ni galoga i bo dipar pagohon ia ma sakaliang duru ni gauma nia i, saguman bahal dipasosot ia ma panangkal i disi.

Dua borngin do dung dibaen Lambe So Malos panangkal i ro ma musuna. Adong do tonga dua pulu. Diparsude halahi ma eme i ni Lambe So Malos i timpas sudena.

Homang roha ni Lambe So Malos hara ni aha anso nada mangasi tangkal na binaen ni datu i.

103. Mambuat ipon

Poso dope suhu i hum tolu dope dakdanakna madung loban-gon. Hum sait dohot ngadolnia doma na adong tading. Anggo iponnia naso adong be.

Di horja na baruon sun ma ibo ni rohangku mangida suhu i.

Angke humusil-kusil sajo doma juhut i di pamangannia, nada tarkil ia be.

Tai anggo Ompu ni Monton, haru pe boto hamu numma to-bang ia, pahompunia sian anak dohot sian borunia madung jaji, anggo iponnia laing togu dope sude. Ulang be juhut salangkon holing-koling tarpolgak ia dope. Anggo pangidahon panobang ni Ompu ni Monton nian na tama anaknia dope suhu i. Na sai poso lobangon ma. Dalanna anso songon i boto hamu, angke Ompu ni Monton na jolo nasu olo do ia dompak na poso ia mambuat ipon. Tai anggo suhu i na margondang marogung mai na jolo mambuat iponna, boti dope nilontik iponnia i. Ligi hamu ma saguman halak na dung mambuat ipon, sai jumotjot do i mahancit iponna. Hara ni ima anso na tibu-tibu lobangon halak na dung mambuat ipon. Sugari sura he na tama binaen mambuat ipon, biasi ma nada mambuat ipon halak Ulando? Antong dakdanak ulang hamu olo mambuat ipon songon halahi na parjolo i. Sanga mahancit ipon-muyu tibu muse hamu lobangon.

104. HURIMBANG

Muda unjung do diida hamu tirangkap ni monci songon i ma pangalaho ni hurimbang. Togal tutu tirangkap baen pambuat ni monci, hurimbang pambuat ni babiat.

Di luat Batang Natar boto hamu, nada i hum babiat na ni-hurimbangan, urisa pe laing dihurimbangi halak do. Muda adong sopo na tading di tonga ni gasgas jotjot do ro urisa tu taruma ni sopo i mangambul antusanna mandilati pantar tontang ni batu panggilingan i sai na adong do i disi aek-aek ni sira na tading. Muda diida halak jotjot urisa mangambul tu sopo i digantungkan halak ma i, harung sira sanga parsiraan tusi. Laing songon i ma bisukna dibaen halak, pasomal-somal urisa i. Dung hadian ma dihandang halak ma togu taruma ni sopo i, tai nada tola bulus saulak sidung nihandang anso ulang mangaro roha ni urisa i. Lolot-lolot nihandang ma tuk sangkaliang, tai laing ni patalak sajo jolo songon i pituna i. Haru sira pe ulang mantak binaen tusi. Dung somal-somal boti singon i disi dope anso binaen pintuna i marbaor mar-

pinjil. Dung i nitaon ma; ganop ari angkon niligi ma tusi. Songon i ma da dibaen halak hurimbang ursä.

105. Sinaiasan

Na jotjot ma masa abar di huta ni Jasinandean. Anggo halahi na sabagas nian, ibo rohana nada jungada hona. Angke Jasinandean na ias dabo ia di bagasan bagasnia. Laing tongtong do na ias ganop sogot ganop potang do ia manyapu. Nada marimbar sanga sadihari iba ro tu Jasinandean ianggo sarop-sarop naso adong do i niida disi. Humaliang ni bagasnia bope antong tarumana ias situtu. Naso adong do i niida disi marlongko pandurus-durusan parabitonnia. Rongkon halahi na sabagas sudena antong nada sai na godang-godang arga. Tai bope songon i laing tongtong do i ias.

Sanoli ro ma anakboru tu bagas ni Jasinandean giot pabaenkon ajimat tangkal ni abar begu mamolus. Angke taru umpe maradian halahi na sabagas margonti-gonti marnyae.

Dung disurduhon anakboru i burangir di Jasinandean, "Dia on nakatna dia ultopna, dia on hatana, dia nadidokna," ning Jasinandean.

"Anso dalanna ro au da tuson manopotkon hamu na giot pabaenkon ajimat tangkal ni abar begu mamolus do au di hamu. Angke boto hamu na bila ma tondinami na sabagas," ning anakboru mandok Jasinandean.

Huyom do ma Jasinandean mambege hobar ni anakboru i, laho mangkuling, "Aropku dabo diambang hamu do na marajimat au nada boto hamu songon i, hum sada ma ia gonti ni ajimatku di bagasan bagasku humaliang; bagasku, parabitonnami sude tongtong ias. I do boto hamu ajimat na gumogo, boti na mangasina, "ningi Jasinandean mandok anakboru nangkinan.

106. Halak Harangan

Tolu halak Siondop langka margitan tu Angkola Jae. Dung adong bariba bulan halahi na margitan i di tor Sibalanga dumpang halahi ma gitan sasorat ni halahi be. Jadi tumahi ma halahi muli.

Dung bolkas halahi tu Sigalangan, sun ma lojana dilala halahi.

Bo dijalahi halahi ma disi bendi paroban ni halahi tu Sidimpuan anso nigadis tu Sidimpuan gitan i. Dumpang ma nian bendi, tai hum dung diida parbendi i dokdok ni boban ni halahi na tolu, nada ra be parbendi i maroban halahi.

Mangkuling ma da halak Siondop i sada halak adop bayo parbendi i, songon on ma dabo angkang tabaen, laing oban ma hami. Anggo au bobanku indangkon sai bendimi marobansa. Hutompi pe, saratna do tibu bolkas," ning ia. Dipadonok na patoluhon i muse ma laho mangkuling, "Oban ma ba tusi hami angkang, indangkon sak rohamuanggo hara ni dokdok ni boban-nami on. Anggo au indangkon lanom parjugukku di bendi i; singgang pe au marsinayang anso nayang saraton ni kudomi," ning ia.

Giot polut ma martata bayo parbendi i umbege otona pangkobar ni bayo na tolu halak i.

107. Laing muap do na busuk

Madung togap marmahan si Modang, tai laing na so nisuru ni amangnia dope ia marsikola. Harani i ma na so haru binotonia do na pade.

Tar dodas ma boto hamu disuru inangnia bope amangnia ia manobus-nobusi sanga aha rongkot ni roha ni halahi, tai boto hamu naso nitobuskonnian do i pitis i sude. Dibuat ia do i disia deba.

Sanoli disuru inangnia ma ia kehe manobusi miyak manis Ditobusi ia pitis na tonga dua uang. Dibunihon ia ma di tongan dalan dabo. Digohi ia ma i botol i rongkon aek anso gok ulang diboto inangnia kicunia i.

Dung digorengkon inangnia miyak i tu gulaen bo mamuretek sajo doma. Jadi dipatankas inangnia miyak i. Hapengani na dung marbaur aek do.

Muruk-muruk ma inangnia disia. "Muda nada dipauba ho jat ni rohami, anggo ho hona uhum na dokdok do ho tupudion," ning inangnia mandok ia.

Antong tutu do na nidok ni halak, laing muap do na busuk.

108. Surat ni Manjuram

Inangan ni Manjuram di hauma na punjung na dao do sian huta langgamannia, gabe ulubalang ni raja i. Muda adong halak alao on, ia ma disuru raja i mangalapsa.

Adong mada halak na giot alapon. Bo ditongos raja i ma surat di Manjuram. Mangalusi ia songon on ma hatana:

On ma surat tumopot Manjuram ulubalang di Banjarlatong.

Di ari na haduan ulang so ro ho mangalusi au, dibaen adong dalananmuna sosak.

Sian au moramu,

Sutan na Lumbang

Dung sabo dijagit Manjuram surat i disise ia ma diboto ia ma hatana mandok haduan ia kehe mangalusi raja i. Torang ari diulak-kon ia muse surat ni raja i, laing tong mandok haduan." Jadi haduan noma tehe au langka ningi Manjuram.

Dumpang ma na haduan disise Manjuram muse ma mulak surat i laing mandok haduan do. "Antong haduan muse noma au langka," ningi rohania. Laing songon i ma ganop-ganop dumpang na haduan. Disise ia mulak surat i lopus nada lalu ia kehe mangalusi raja i.

Hara ni madung sayop roha ni raja i nada lalu ro be Manjuram rimas ma ia, bo disuru alap raja noma Manjuram angkon udur ro dohot na mangalap i.

Andospotang ro ma Manjuram tuadopan ni raja i. Didok raja i ma, "Biasi he nada ra ho ro mangalusi au songon na hudok di suratki Manjuram," ning raja i.

Marsantabi ma Manjuram laho mangalusi, "Tai antong Janami tadok di suratta i, haduan dope au ro mangalusi hita, on ma bo suratta i." ning Manjuram.

Dung dipatangkas raja i suratnia i, peto ma na nidok ni Manjuram i. Rara doma bohi ni raja i ila rohana.

109. Hata Gonjak

Bahat do halak na margonjak di hobar mambaen halak martata; adong muse na pargonjak dohot parangena.

Jasebola ma boto hamu na songon i. Na lobi bahat hata gonjak diboto ia. Barang tu dia sanga ise pe alonia mangkatai, angkon laing na mambaen hata gonjak do ia.

Naoni kehe ma Jasibola rap dohot bayo na jezap pajjur parira. Bayo na jezap i na lobi jezap. Huhul hum mandok sada hata pe giot-giot so lalu ia do hara ni jezapna.

Hum dung tarpajjur halahi parira i mangarohai ma Jasibola, "Huarsak jolo bayo na jezap on anso siar jejapnia i," ning rohania. Dibagi Jasibola ma da parira i. Otik dibaen ia di bayo i. Boti dipulditi ia na poso-posona, dipajaji ia disia boti tumobang-tobang. Dung songon i didok Jasibola ma di bayo na jezap i, "On ma da tumpukmu na otikna on, on di au na jumajina on," ning ia. Aha dope bo siar ma dilala bayo na jezap i jabat mangkapistak ijur na jezap i marsaor milas ni rohana. Umpe lalu tardok ia dohononia di Jasibola. Dung lolot ma maturamram bayo na jezap i, laing so tulus tardoksa hatana bo mangkuling Jasibola,

Sileker balau ...

Jajian di ho ulang di au

Ning ia mandok bayo i, laho dilchen ia parira na jajina i di bayo na jezap i. Dibuat ia na otikna i disia. Dung i dope anso sip bayo na jezap i.

110. Marpulut

Muda marbatu panganan dipuluti halak ma i anso dumpang pidong na marroan tusi, tai boto hamu nada hum pidong na ni pulutan ni halak, babiat pe jungada do dipuluti halak.

Naoni di Mandalasena disoro babiat mada lembu. Bo tumahi na sahuta i pasingkop pulut. Adong do sahuali bahatna Dung sun dengen dimasak halahi pulut i, dialap halahi muse ri dohot durame. Na jajian. Disarsar halahi ma da durame i dohot ri i markaliang soroan i. Jadi disirsirkon halahi ma pulut i sap durame dohot ri i.

Potang ari boto hamu ro ma bagiat i mangulakkon tu soroan i. Dibolus ia ma durame dohot ri i. Hum lohot dilala ia durame dohot ri i tu patnia dihurpiskon ia. Dompok mangurpiskonsa dope

ia, lohot muse ma tu patnia na sabariba nari. Bo dipajuguk ia, lohot muse tu lailainia. Milas rohania ro babania. Lohot muse tusi, palit muse ma tu matania dohot tu pinggolnia. Bo margulang-gulang doma ia marbalun durame dohot ri i. Ditungkassa ma ia songon dia lungguk doma boto hamu babiat i dabo. Inda be diboto ia tondongonna; so sajo doma ia disi margaum-ngaum. Torang ari ro ma halak maroban bodil. Bo dodil halahi ma babiat i mate.

SUNTUT



PN BALAI PUSTAKA — JAKARTA

Perpustakaan
Jenderal

89